



## Reglur fyrir leikskóla í Bláskógabyggð

**Gildissvið:** Reglur þessar gilda um umsókn og innritun í leikskóla Bláskógabyggðar og um gjaldtöku og innheimtu fyrir leikskóladvöl. Foreldri er hér notað yfir þá sem fara með forsjá barns skv. barnalögum.

1. Skólanefnd leggur áherslu á nægilegt rými til að veita öllum börnum á leikskólaaldri sem þess þurfa leikskólavist. Skilyrði fyrir leikskóladvöl barns er að lögheimili þess skv. þjóðskrá og föst búseta sé í Bláskógabyggð. Börn sem hafa lögheimili í öðru sveitarfélagi fá ekki leikskólavist í Bláskógabyggð nema fyrir liggja staðfesting lögheimilissveitarfélags á greiðslu hluta þess í leikskólakostnaði.
2. Börnum er úthlutað leikskólaplássi eftir kennitölu, þeim elstu fyrst, miðað við stöðu umsókna þann 1. maí. Tekið er við 12 mánaða gömlum börnum og eldri í leikskólum Bláskógabyggðar. Berist umsókn um leikskólavist fyrir yngra barn er sú umsókn metin útfrá aðstæðum hverju sinni.  
Unnt er að sækja um forgang að leikskólum Bláskógabyggðar vegna:
  - a. Barna starfsfólks leik- og grunnskóla sveitarfélagsins
  - b. Barna sem eru orðin 4-5 ára.
  - c. Fatlaðra barna og barna með alvarleg þroskafrávik.
  - d. Barna sem búa við erfiðleika í félagslegu umhverfi og þurfa forgang að mati velferðarþjónustu.
  - e. Barna einstæðra foreldra.
3. Sótt er um leikskólavist á eyðublaði sem leikskólarnir láta í té eða í Karellen leikskólakerfinu. Leikskólastjóri tilkynnir foreldrum hvenær barnið getur hafið leikskólagöngu. Áður en leikskóladvöl barns hefst gera viðkomandi leikskóli og foreldrar með sér dvalarsamning.
4. Litið er á sveitarfélagið allt sem eitt svæði hvað varðar leikskólavist. Foreldrar geta þannig sótt um skólavist fyrir börn sín í hvorum leikskólanum sem er, óháð því hvar þeir búa í sveitarfélaginu. Foreldrar geta sótt um flutning á milli leikskóla. Eftir að sótt er um flutning er farið eftir innritunarreglum, sbr. 2. gr. reglna þessara.
5. Tvisvar á hverju skólaári er hægt að óska eftir breytingum á vistun. Þegar um sérstakar aðstæður er að ræða er hægt að óska eftir breytingum oftar. Óski foreldrar eftir breytingu á vistun barna sinna eða að segja upp vist skal gera það skriflega fyrir 15. hvers mánaðar og skal uppsögn eða beiðni um breytingar berast leikskólastjóra. Breytingar taka gildi um mánaðarmót.



6. Leikskólar eru opnir virka daga frá kl. 08:00 – 16:00 nema á föstudögum, en þá er opið frá kl. 08:00 til kl. 14:00. Hægt er að kaupa þjónustu frá kl. 14:00 til kl. 16:00 á föstudögum en skrá þarf barn sérstaklega og greiða fyrir þjónustuna. Skráningu lýkur á fimmtudagskvöldi vikuna á undan, þ.e. rúmri viku áður en nýta skal þjónustuna. Styttning opnunartíma, þ.e. að ekki verði opið eftir kl. 16 í leikskólanum Álfborg, tekur gildi 1. maí 2025. Skráning vistunar á milli kl 14 og 16 á föstudögum tekur gildi 1. mars 2025.

Hægt er að óska eftir sveigjanlegri vistun fyrir börn. Sveigjanleikinn getur verið hluta úr degi eða fleiri dögum í viku, en alltaf fastir dagar. Þó getur vistun skemmst verið fjórir tímar. Semja skal um vistunartíma við hvorn leikskóla fyrir sig í dvalarsamningi skv. 3. gr. reglnanna. Frá og með 1. ágúst 2025 geta börn á aldrinum 12-18 mánaða að hámarki fengið vistun í 6 klukkustundir á dag.

7. Bláskógabyggð greiðir stærstan hluta kostnaðar við rekstur leikskóla. Foreldrar greiða hluta kostnaðar í hlutfalli við tíma sem börn þeirra dvelja í leikskólanum, svonefnt grunnjald. Fjárhæð grunnjalds á hverjum tíma er samkvæmt gjaldskrá leikskóla Bláskógabyggðar eins og hún er birt á heimasíðunni [www.blaskogabyggd.is](http://www.blaskogabyggd.is). Foreldrar eru ábyrgir fyrir greiðslu gjalda fyrir leikskóladvöl skv. gjaldskrá.
8. Leikskólar eru lokaðir vegna sumarleyfa sex vikur á hverju sumri og er ekki innheimt gjald fyrir börnin þann tíma. Foreldrar geta sótt um allt að 4 vikna leyfi til viðbótar fyrir börn sín og greiða þá aðeins hálf grunnjald á meðan. Heildarsumarleyfið skal vera samfellt. Leikskólar eru lokaðir frá og með 23. desember til og með 1. janúar og er ekki innheimt gjald fyrir börnin þann tíma.
9. Frá og með 1. mars 2025 verða innleiddir sérstakir skráningardagar í leikskóla Bláskógabyggðar. Skrá þarf börn sérstaklega og greiða fyrir þjónustu þá daga skv. gjaldskrá. Skráning skal fara fram þremur vikum áður en þjónustan skal veitt. Skráningardagar eru í haust- og vetrarfrii grunnskóla og dymbilvikum. Skráningardagar verða tilgreindir í skóladagatölum leikskóla fyrir hvert skólaár. Skóladagatöl skólaársins 2024-2025 haldast óbreytt.
10. Ekki er innheimt dvalargjald ef skerða þarf vistun barns um heilan dag vegna faliðunar, niðurfelling tekur þó einungis til gjalds skv. tölulið A í gjaldskrá leikskóla Bláskógabyggðar. Ekki er veittur afsláttur eða niðurfelling gjalda vegna annarra leyfa eða lokana, t.d. vegna óveðurs, eða skipulags- og námskeiðsdaga.
11. Ný gjaldskrá tekur gildi í upphafi árs. Afslættir frá gjaldskrá eru eftirfarandi:
  - a. Systkinaafsláttur með 2. barni: 50%
  - b. Systkinaafsláttur með 3. barni: 75%
  - c. Einstæðir foreldrar skv. þjóðskrá (1. og 2. barn): 50%
  - d. Öryrkjar (75% eða meira): 50%
  - e. Annað foreldri í námi: 50%



- f. Báðir foreldrar í námi: 75%
- g. Einstætt foreldri í námi: 75%
- h. Starfsfólk leikskóla í 50% starfshlutfalli eða meira: 10%.

Afsláttur skv. þessum reglum er veittur, að öllum skilyrðum uppfylltum, til þess foreldris sem hefur sama lögheimili skv. þjóðskrá og fjölskyldunúmer og barn á leikskóla.

Afsláttur skv. þessum reglum er ekki veittur afturvirkur. Afsláttur fellur niður án fyrirvara uppfylli foreldrar ekki skilyrði afsláttar.

Námsmannaafsláttur miðast við að námið sé lánshæft skv. viðmiðunarreglum Menntasjóðs námsmanna. Skrifstofa Menntasjóðsins veitir upplýsingar um þá skóla og það nám sem metið er lánshæft. Námsmaður skal vera í a.m.k. 75% námi á háskólastigi en í 100% námi sé hann í sérnámi.

Þessi afsláttur á einnig við ef stundað er fullt nám á framhaldsskólastigi.

Skólavottorð berist skrifstofu Bláskógabyggðar í janúar og september ár hvert.

Námssamningar berist skrifstofu Bláskógabyggðar í byrjun samningstímans.

Tilkynningum um breytingar á hjúskaparstöðu skal skila til skrifstofu Bláskógabyggðar þegar breyting hefur verið skráð í þjóðskrá.

12. Heimilt er að innheimta aukagjald ef dvöl fer fram yfir umsáminn vistunartíma. Gjaldið reiknast fyrir hverjar byrjaðar 15 mínútur og er ákveðið í gjaldskrá leikskóla. Afslættir reiknast ekki af gjaldinu.

13. Leikskólagjöld eru innheimt fyrirfram. Gjaldalagi er 1. hvers mánaðar og eindagi 20 dögum síðar.

Séu leikskólagjöld ógreidd 10 dögum eftir eindaga fær greiðandi senda ítrekun frá banka. Hafi krafa ekki verið greidd 60 dögum eftir eindaga fær greiðandi senda innheimtuviðvörðun frá innheimtufyrirtæki.

Auk dráttarvaxta sem reiknast af höfuðstól kröfu frá gjalddaga fram að greiðsludegi, sé greitt eftir eindaga, bætist við kostnaður við útsendingu ítrekunarbréfa og innheimtu á greiðanda.

Bláskógabyggð áskilur sér rétt til að segja upp dvalarsamningi barna foreldra hafi greiðsla ekki borist 110 dögum frá gjalddaga. Uppsögn miðast við mánaðarmót og er uppsagnarfrestur einn mánuður.

Komi til þess að barn sem hafið hefur leikskólagöngu nýti ekki leikskólaláss í tvo mánuði, án samráðs við leikskólastjóra, er heimilt að segja upp dvalarsamningi barnsins. Uppsögn miðast við 1. hvers mánaðar og er uppsagnarfrestur einn mánuður.

14. Leikskólar Bláskógabyggðar starfa skv. lögum um leikskóla nr. 90/2008. Ákvarðanir Bláskógabyggðar um rétt einstakra barna til aðgangs að skóla og um rétt til sérstakrar aðstoðar og þjálfunar er hægt að kæra til mennta- og menningarmálaráðuneytisins, sbr. 30. gr. laga nr. 90/2008. Ákvarðanir um gjalddöku fyrir barn á leikskóla er hægt að kæra til mennta- og menningarmálaráðuneytisins, sbr. 30. gr. laga nr. 90/2008. Aðila máls er heimilt að kæra til innanríkisráðuneytis þær ákvarðanir Bláskógabyggðar er kveða á um rétt eða skyldu manna sem lúta eftirliti ráðuneytisins, sbr. 111. gr.



sveitarstjórnarlaga nr. 138/2011. Kærufrestir eru þrjú mánuðir frá því að aðila máls var tilkynnt um stjórnvaldsákvörðun.

*Reglur þessar eru samþykktar í sveitarstjórn Bláskógabyggðar*

*þann 5. febrúar 2025*